

Ina historia d'ina amicezia – e da trumpadas

Leontina Lergier-Caviezel ha presentau il roman «Nus duas»

■ (anr/gv) «Tochen gliez gi. Cu nossa amicezia ha calau d'exister. D'in mument sin l'auter. Pongir.» La fin dall'emprema part dil roman «Nus duas» caztga. Tgei ha tratg dapart las duas giuvnas? Quei ha *Leontina Lergier-Caviezel* buca vului tradir la gievgia sera. Ella ha presentau el Cinema sil Platz a Glion sia secunda ovra ed igl interess ei staus gronds. *Maria Cadruvi* ha moderau la presentaziun e *Corin Curschellas* ha tschercau treis canzuns che han corrispuindiu alla historia dall'autura da Vrin. «Nossas conscolaras crein aunc adina che nus seigien inseparablas. Brida ed jeu. El las probabel gnanc sminan.» Quels plaids ein silla cuviarta dil cudisch cumparius ella Chasa editura rumantscha. *Maria Cadruvi* ha legiu il cudisch – il pli bugen havess ella entschiet e calau senza paus. «L'autura ha tenui la tensiun tochen tier la davosa construcziun», ha l'antieriura collaboratura da RTR detg. Fertion che l'autura ha legiu entginas paschas dil cudisch da 230 paginas ha *Maria Cadruvi* tradiu entgins fatgs dalla historia. «Igl ei in roman d'ina amicezia, l'amicezia d'ellas duas.» L'autura raquent la historia ella fuorma «jeu», puntuescha denton ch'ella seigi buc identica culla persuna descretta. L'amicezia vegn messa sin emprova: «Ina amicezia che vegn strapazzada ed ina amicezia che rumpa zacu. E forsa, forsa ch'ella renscha.»

Leontina Lergier-Caviezel ha scret historias gia sco buoba ed era publicau differentamein quellas. Il scriver seigi seadus dil leger, ha l'autura detg. Igl emprem roman cul num «Romana» ha la dunna che viva cun sia famiglia ella vischinonza da Berna publicau avon tschun onns el 71avel «Tschespet». Per scriver la nova ovra ha *Leontina Lergier-Caviezel* creau in concept e tenor ses



Leontina Lergier-Caviezel ha prelegiu da siu niev roman «Nus duas» el Cinema a Glion.

FOTO G. VENZIN

plaids «modellau las figuras el tgau». Inaga alla lavur ha ella fatg midadas dil concept «perquei ch'el mava buc a prau cullas figuras». L'autur ha raquintau da sia lavur al computer: «Jeu hai scret cun disciplina e perseveronza. Hai entschiet suenter solver e scret tochen miezdi.»

«Nus duas» ei il tschunavel cudisch edius dalla Chasa editura rumantscha menada d'*Anita Decurtins*. Ella presentaziun dalla Chasa editura scriva la menadra: «*Leontina Lergier-Caviezel* fui buc en quei roman dalla realitad e dolor. Ei vegn mess il det ella plaga.»

Frestg e captivont numna *Anita Decurtins* la nova ovra. Il cudisch ei edius en 500 exemplars. *Leontina Lergier-Caviezel* prelegia ils 17 d'avrel allas 17.00 ella Biblioteca Trun ed ils 24 d'avrel allas 14.00 el Hotel Péz Terri a Vrin.

Ils «cussegliers naziunals» dalla scola da Sedrun (part2)

■ Il temps s'avonza ed ils scolars e las scolaras dil scalem superior da Sedrun fan mintga di novas scopertas politicas ella capitala. Igl inscunter culla cussegliera naziunala, *Brigitta Gadiant*, ei staus fetg impressiunonts. Pér cu ella ha raquintau da sia lunga carriera politica e dall'immensa lavur che schai davostier, realiseschan nos «cussegliers» giuvens tgei ch'ei munta veramein da far politica sin quei nivo. Silsuenter vein nus astgau prender investa dallas salas dils dus cussegls, dil cussegl naziunala e dil cussegl dils stans. – Secapescha, il punct culminont ei bein stau da survegnir igl agen plaz ella sala dil cussegl naziunala. Vegn nossa partida plazzada dalla vart dretga ni dalla vart seniastra? E pren mi-

ra, quei che pudess corrispunder a nies natural muntagnard, ils cussegliers da nossa fracziun vegnan posiziunai el miez dalla runda...

Il suentermiezdi ha la lavur da fracziun cuntinuau. Formular posiziuns tier las differentas iniziativas e cunterproposas – reparter incaricas als plidaders pil plaid al pult en sala dil cussegl naziunala – exercitar da presentar quels votums... Malgrad che la tensiun ei carschida ussa considerablamein, empeilan *Linda e Joel*, la presidenta ed il vicepresidente dalla fracziun, oreifer las sesidas.

Gievgia endamaun ha giu liug ina viseta ell'ambassada dalla Terchia. Ina distrazziun beinvegnida per tener a mistregn la gnarva per la sessiun dil suen-

termiezdi. Denton era per quei inscunter ha ei giu num sepreparar, emprendre d'enconuscher entginas caussas specialas da quella tiara e preparar zacontas damondas agl ambassadur. Quel ha mussau l'entira ambassada a nus ed ei staus a disposiziun a moda fetg simpatica per damondas da tut gener.

Il suentermiezdi ei lu staus il punct culminont dall'entira jamna. Ella debatta dil cussegl naziunala ei mintga cusseglier respectivamein cussegliera da nossa fracziun seprentaus cun in votum al pult da plidar. Era sche noss' iniziativa ha buc anflau accoglientescha el parlament ein scolaras e scolars fetg loschs che silmeins la cunterproposta dalla cumissiun ei vegnida acceptada dil

cussegl, malgrad che la representanta dil cussegl federal, anteriura cussegliera federala *Elisabeth Kopp*, haveva proponiu da refusar ton l'iniziativa sco era la cunterproposta.

L'jamna va a fin ed ei vala da trer ina bilanza. Nus havein astgau guder a Berna in'organisaziun perfetga e survegniu ina bun'investa els fatgs politics da nies stadi. Pils scolars e las scolaras vegn quei a restar in'jamna nunemblideivla cun numerusas experienzas da gronda valeta. Igl engaschi e la disciplina ein stai fetg buns ed era las relaziuns socialas eifer la classa han fatg grond progress. Nus tuts essan satisfatgs grondamein da quell'jamna.

Manuela Schnoz-Flury e Gieri Spescha



Fatschas cuntentas suenter la sessiun el cussegl.

FOTOS MAD



Cussegliera naziunala Thürig durant siu plaid, anteriura Cussegliera federala a Kopp teidla attentamein.

Novas variantas e novas purschidas

■ (anr/gv) La radunonza generala dall'Uniun plazza da golf Sedrun e dil Club da golf Sedrun ei stada inagada dapli beinfrequentada, la sala el hotel Cruna a Sedrun emplenida. Il president *Kurt Künzli* ha saviu rapportar d'in bien onn da fatschenta. Sepagadas seigien las investiziuns ellas vias, ils vehichels electricis secumprovai. Il quen favoreivel seigi en emprema lingia d'attribuir alla disciplina d'expensas, ha il president constatau. Ils presents han eligiu *Fanta Zdenek* da niev el cussegl d'administraziun. El representa ils commembers dalla Bassa ed occupescha il plaz vacant dapi in onn. La plazza da golf a Tschamut ha in niev manager, quei ella persuna da *Seppi Jörg* da Domat. El ei staus plirs onns ella medema posiziun a Domat e *Kurz Künzli* constatescha: «*Seppi Jörg* representa professionalitad e persistenza.»

L'engrondaziun dalla plazza da golf Sedrun ei vinavon la finamira dils responsabls. Il president fa denton valer che quella engrondaziun fetschi mo senn en collaboraziun cullas activitads da Sawiri ad Ursera. Ellas contractivas cun *Andermatt* giaviescha *Kurt Künzli* ina varianta finida che cunvegn ton alla vischnaunca sco al cantun ed agl uffeci digl ambient. Igl architect *Peter Harra-din* ei vid la lavur. Las variantas dall'engrondaziun viers vest han tochen dacheu aunc buca cuntentau. Culla cartaziun dalla vischnaunca da *Tujetsch* hagi l'uniun plazza da golf in manual che levgieschi la lavur. *Kurt Künzli* quenta cun ina varianta approvada el decuors da questa primavera.

Per augmentar las frequenzas dalla plazza da golf alpina porscha il club pauschalas a hotels ed ad interpresas. La purschida che cuosta 1100 francs lubescha als hoteliers da porscher a lur hosps pauschalas da golf attractivas ed allas interpresas da porscher a lur collaboratur e clientella fuffernadis grautis.

La pcd grischuna nominescha a Domat

■ (cp) La Partida cristiandemocratica (pcd) dal Grischun nominescha ses candidat per il cussegl dals chantuns ed ils candidats e las candidatas per il cussegl naziunala venderdi, ils 15 d'avrigl en la halla Tircal a Domat.

La radunanza da nominaziuns vegn averta tras la presidenta da la pcd grischuna, deputada *Elita Florin-Caluori*. Cun quei ch'ella ei era candidata per il cussegl naziunala sa splegan las nominaziuns sut l'egida da *Barla Cabannes*, viceparsura da la pcd chantunala. L'antieriur cusseglier guvernativ, *Stefan Engler*, vegn a referir davart: «Persuenter s'engascha la pcd ils proxims 4 onns.»

L'emprim vegn il candidat per il cussegl dals stans nominà. Sulet proponi persuenter è l'antieriur cusseglier guvernativ *Stefan Engler*. Suenter suonda la nomina da las candidatas e dals candidats da la suletta glista da la pcd per il cussegl naziunala. Las partidas circuntalas e regiunalas proponan: *Vincent Augustin*, *Cuira*, *Renata Birrer*, *Lai*, *Martin Candinas*, *Rabius*, *Elita Florin-Caluori*, *Panaduz* e *Tino Zanetti*, *Puschlav*.

Suenter la presentaziun e recumandaziun dals candidats vegn vuschà. Sch'i na vegn betg proponi pli che tschintg candidats (tants mandats ha il Grischun dad occupar en il cussegl naziunala) decida in sulet scrutini (cun il relativ pli) la successiun sin la glista tenor ils resultats cuntanschids. La strategia da la cumissiun electorala vegn ses manader, deputà *Ralf Kollegger*, a dilucidar. Alur vegn dà enconuscher il resultats dals candidatAs. Preschentada vegn quella saira era la glista da la pcd giuvna dal Grischun tras ses president *Maurus Berni*.